



The Holy See

IOANNES PAULUS EPISCOPUS

SERVUS SERVORUM DEI

AD PERPETUAM REI MEMORIAM CONSTITUTIO APOSTOLICA **KOTIDOENSIS** IN UGANDA NOVA
DIOECESIS CONDITUR

Florem Africanæ Ecclesiæ non soli Nos summa cum supremi pastoris lætitiæ et consolatione etiam ex longinquo conspicamur sed reliqua ferme universa catholicorum per orbem communitas mirans simul laudansque contemplatur. Progredientem vero celeriter illam fidei maturitatem atque institutionum soliditatem facile reperiri licet in dilectissima quoque Ugandæ natione, ubi singuli iam ita crescunt christifidelium greges ut aegre ab uno convenienter gubernentur et adiuventur sacrorum Antistite. Venerabiles propterea Fratres Nostri, a quibus causæ tractantur Congregationis pro Gentium Evangelizatione, non sine probabili omnino causa suaserunt ut in aliqua Ugandæ regione excitaretur ab integro nova ecclesiastica dicio. Pro certo autem habentes Nos hoc consilium plurimum commodis Ecclesiæ et spiritali profectui ibidem fidelium profuturum iuvat hæc quæ adiciuntur ex apostolica Nostra auctoritate decernere ac fieri iubere. Dioecesim in præsentia Morotoensem sic dividi placet in partes ut civilis regio Kotido nomine ab illa seiuncta efficiatur nova dioecesis in posterum tempus Kotidoensis quæ dicetur quæque Congregationi pro Gentium Evangelizationi subdita pariter subdatur uti suffraganea Metropolitanæ Ecclesiæ Kampalaënsi. In urbe insuper Kotido ipsa defigi volumus episcopalem sedem ; sed aedes sacra Beatissimæ Virginis Mariæ sub Maternitatis ipsius præclaro titulo in vico vulgo Kanawat sita erit cathedrale novæ huius dioecesis templum. Ob locorum ipsiusque temporis adiuncta eligentur et usurpabuntur pro canonicorum capitulo ipsi ex norma iuris consultores dioecesani. Exsequenda vero hæc Nostra edicta singillatim curabit Venerabilis Frater Aloisius Robles Diaz, Archiepiscopus titulo Stephaniacensis simulque in Uganda Pro-Nuntius Apostolicus cui præcipimus ut verum usus publici dictæ executionis exemplum ad Congregationem pro Gentium Evangelizatione perferat. Denique tandem tum hæc tum cetera universa ad sacros canones huius modi in negotiis servanda servantur quam diligentissime, contrariis quibusvis rebus minime obstantibus, et in præsens et in omne præterea posterum tempus. Datum Romæ apud S. Petrum die vicesimo mensis Maii anno Domini millesimo nongentesimo nonagesimo primo Pontificatus Nostri decimo tertio.

ANGELUS SODANO, archiep.	IOSEPHUS card. TOMKO
<i>Prosecretarius Status</i>	<i>Congr. pro Gentium Evang. Praef.</i>

Marcellus Rossetti, *Protonot. Apost.*

Antonius Macculi, *Protonot. Apost. s.*

n.

*A.A.S., vol. LXXXIII (1991), n. 11, pp. 913-914 © Copyright 1990 - Libreria Editrice Vaticana
